

# Perkampungan haram etnik Rohingya di Sentul diserbu

Petempatan di tanah milik kerajaan dilengkapi bekalan air, elektrik serta kedai runcit

Oleh Raja Noraina Raja Rahim  
bhnews@bh.com.my

**Kuala Lumpur:** Jabatan Imigresen menyerbu petempatan haram warga asing yang kebanyakannya dihuni etnik Rohingya, di Sentul, dekat sini.

Petempatan di tanah milik kerajaan itu turut dilengkapi kemudahan bekalan air dan elektrik.

Bukan itu saja, mereka turut menjadikan kawasan berkenaan seperti di kampung halaman dengan bercucuk tanam dan memeli-

hara ternakan, selain mempunyai kemudahan kedai runcit sendiri.

Dalam operasi bermula jam 12.30 tengah malam kelmarin, terdapat segelintir warga asing yang cuba melarikan diri dengan memanjat bumbung rumah dan bersembunyi di sebalik timbunan besi, namun berjaya ditahan anggota penguat kuasa.

Ketua Pengarah Imigresen Datuk Ruslin Jusoh, berkata serbuan dijalankan dengan kerjasama Polis Diraja Malaysia (PDRM), Dewan Bandaraya Kuala Lumpur (DBKL), Pasukan Gerakan Am (PGA) dan Angkatan Pertahanan Awam Malaysia (APM) membabitkan kekuatan 229 pegawai serta anggota.

Beliau berkata, seramai 124 warga asing ditahan untuk pemeriksaan terdiri daripada warga Myanmar, Indonesia dan India.

Katanya, petempatan haram itu dihuni oleh warga asing yang sebahagiannya sudah berkeluarga dari Myanmar dipercayai etnik Rohingya.



Ruslin (dua dari kiri) memeriksa PATI yang ditahan ketika operasi Jabatan Imigresen di Sentul, kelmarin.  
(Foto Eizairi Shamsudin/BH)

## Sewa rumah RM400 sebulan

“Pemeriksaan mendapati terdapat lebih 20 rumah dan lima unit kedai runcit dibina yang menjual barangan keperluan penghuni seperti sirih kapur serta minyak

masak paket bersubsidi.

“Hasil soal siasat awal, warga asing terbabit mendakwa menyewa rumah ini daripada warga tempatan dengan kadar sewa RM400 sebulan. Malah ada

mendakwa sudah tinggal di sini sejak lebih tiga hingga empat tahun lalu.

“Semakan mendapati, kawasan berhampiran sebelum ini adalah kawasan setinggan yang didiami penduduk tempatan tapi kini berlaku pencerobohan tanah dan rumah disewakan kepada warga asing,” katanya pada sidang media selepas menyertai operasi berkenaan.

Turut hadir Timbalan Ketua Pengarah (Operasi) Imigresen, Jafri Embok Taha.

Mengulas lanjut, Roslin berkata, semakan mendapati kawasan penempatan haram itu dibina atas tanah milik DBKL dan pihaknya dengan kerjasama agensi terbabit akan mengesan warga tempatan yang disyaki membina penempatan berkenaan serta menyewakan kepada warga asing.

Beliau berkata, semua warga asing yang ditahan akan dijalankan proses dokumentasi dan siasatan lanjut oleh pihak Imigresen Kuala Lumpur.